

شاهد عيان من نوع فريد

آخر النهار

فات من هنا

والشمس راحت للمبيت

عند الجيران

لجل ان تواصل عزفها

ليلة فرح

رقص وصخب

وبدون أوان

شق العزا صوان الفرح

الصمت خيم ع المكان

ويا الخشوع

لمعان دموع مع تمتمة

عين الحقيقه مبهمة

كل الخيوط اتشبكت

واتشتت فيا الظنون

مين السعيد

مين انجرح

صاحب العزى

دا يبقى مين

ويبقى مين صاحب الفرح

شطبنا قاموا

اتسرسبوا

زى السحاب

الكل غاب

فكوا الصوان

بين المعازى والفرح

شفت المروؤة والجشع

والعفة مش زى الطمع

بكرة الزوابع والرياح

وشمس طالعة

ليوم جديد.. عالم جديد

من غير صوان

عزا أو فرح

والشرح لو طال انجرح